

## TORITENY - ALAHADY faha-23 TSOTRA - TAONA D



*Na iza na iza tsy mahafoy izay rehetra ananany dia tsy mendrika ho mpianatro.*

Ry kristianina havana, raha tamin'ny Alahady lasa teo nampisongadina fa raha te-hiditra ho anisan'ny fianakaviamben'Andriamanitra isika, ho olo araiky ao aminy dia tsy maintsy manahaka an'i Jesoa, Izy izay Andriamanitra dia nanaiky nanetry tena nidina farany ambany hoy Md Paoly ao amin'ny taratasy ho an'ny Filipiana. Natitranterintsika fa tsy maintsy manana fanetren-tena sy halemem-panahy isika ary izay ny fanahafana an'i Kristy. Amin'izao Alahady faha-23 mandavantaona izao dia miombona amin'ireo tsaiky madiniky eto Diego isika amin'izao fankalazana ny kongresy iombonan'izy ireo. Ny ankizy no misioneran'ny famindram-po izany hoe maka tahaka ny fiainan'i Jesoa. Manana an'izay famindram-po izay isika raha manana ny fanetren-tena sy halemem-panahy. I Jesoa rahateo nampianatra fa raha te-hiditra amin'ny fanjakan'Andriamanitra dia tsy maintsy manana ny toetran'ny tsaiky madinika isika dia tsy inona fa ny fanetren-tena sy fahalemem-panahy.

**Vakiteny I :** Fah. 9, 13-18

**Salamo :** Sal. 89

**Vakiteny II :** Filem. 9b-10. 12-17

**Evanjely :** Lk. 14, 25-33

Toetra anankiray ambaran'i Jesoa koa amin'izao Alahady izao dia ny fahafoizana, tsy hanana an'izay toetra izay isika raha tsy manetry tena sy malemy fanahy. Izay tia dia mahafoy hoy i Jesoa. Toetra lehibe tsy maintsy hananantsika izany raha tiantsika ny hifanasoa, hikatsaka ny soa iombonanana, io no mitondra atsika amin'ny fiombonana tanteraka ao amin'i Jesoa. Izay no mahatonga atsika hanana

ny fivoarana marina tokoa. Amin'ny alalan'ny fikatsana ny soa iombonana izay no hahazoantsika tokoa ny tena fiadanana, ny tena fahasambarana ary ny tena fivoarana maharitra izay tiantsika satria tsapa fa lavitra an'izany tokoa isika.

Tsy ho tanteraka izany eritreritra sy ezaka ataonntsika izany : fandraisana an-tànana no hamintinana azy, raha tsy misy ny fahafoizana. Naverimberintsika matetika izany fa amin'izao Alahady faha-23 izao sy andron'ireo ankizy izao dia manamafy fa tsy ho tanteraka tokoa ny famindram-po raha tsy misy fanetren-tena, izay no ampianaran'ny vakiteny voalohany (*Fah. 9, 13-18*).

Ny tena fahendrena dia mahatakatra ny sitrapon'Andriamanitra izany hoe mahafofy : miala amin'ny sitrapon'ny tena, amin'ny fitiavan-tena, amin'ny avonavona sy ny fialonana, ireo no mahatonga ny hery setra sy ny korontana isankarazany. Raha mahafofy isika araka ny fampianaran'ny bokin'ny fahendrena ary izay ny fahendren'Andriamanitra izay ambaran'i Jesoa satria tsy nanao kobaka ambava izy raha nampianatra an'izany fa ny fiainany manontolo no manambara fahafoizana.

Izay koa no maha Kristianina atsika ka aoka ary ry Kristianina havana, hiombona bebe kokoa amin'i Kristy isika ka hiala amin'ireny fitiavan-tena ireny, hahafofy isika izany hoe hahafofy ireo harena tsy mifanaraka amin'ny fahendren'Andriamanitra. I Md Paoly ao amin'ny vakiteny faharoa (*Filem. 9b-10. 12-17*) dia mampianatra an'i Filemona. Tena tiany tokoa i Onezimo, nanasoa azy izy tamin'ny fikarakarana rehetra kanefa noho izany fahafoizana izany no làlam-pianan'ny mpianatr'i Kristy dia nahafofy an'i Onezimo izy ary nasainy niverina any amin'ny Filemona i Onezimo satria araka ny fantantsika dia andevon'i Filemona taloha i Onezimo, ka hoy i Md Paoly nananatra an'i Filemona mba ho toy ny rahalahy fa tsy mpanompo.

Izay tokoa ny vokatry ny fahafoizana ry Kristianina havana, mpirahalaha isika mpianakavy ao amin'i Kristy araka ny hira ataon-tsika. Tsy ho tanteraka anefa izay raha tsy mahafofy isika miala amin'ny fitiavan-tena, hanana ny fanetren-tena sy halemem-panahy ary dia izay no antitraterin'i Jesoa amintsika ao amin'ny Evanjely (*Lk. 14, 25-33*) izay dinihantsika izao : Raha te-hanaradia azy sy te-hanatona azy dia tsy maintsy hametraka azy ambonin'ny zavatra rehetra, izay ny fahafoizana tadiavin'i Jesoa mametraka azy amin'ny voalohan-toerana, izy no harena voalohany dia amin'ny alalany sy miaraka aminy no hitiavana ny zavatra rehetra sy izay manodidina atsika, izay ny dikan'ny hoe "mankahalà ny ray aman-dreninao, ny rahalahy sy anabavinao" Tsy hoe hanapotika, hamono an'izy ireo isika sanatria fa ny tadiavin'i Jesoa dia ho izy no voalohan-toerana ka amin'ny alalany sy miaraka aminy no hitiavana an'ireo havantsika rehetra ireo.

Izay tokoa ny ho tanteraka amintsika raha izy no ivom-piainantsika ka amin'izay dia hiadam-pinaritra isika, izy no atao safidy voalohany. Ilaina izany ny handinihantsika alohan'ny hiroso amin'ny zavatra atao ary ampianariny atsika izany, mba ho afaka hahafofy tanteraka mba hahay handinika ny fiainantsika, izay ny lazain'ny hoe mba hahomby isika amin'ny ataon-tsika dia aoka handinika tsara tahaka an'ireo handeha hiady atao izay hifanarahana, tahaka an'ireo hanorina trano avo, manontany tena ho vitako ve sa tsy ho vitako?

Ny tian'i Jesoa ambara dia ilay fitenintsika matetika hoe "Ady sady dia ny fiaianana".

Ady amin'ny fakam-panahy fa indrindra amin'ny fitiavan-tena izay fantantsika fa manilikilika ny vokany ary raha manilikikika dia ao anatin'ny herisetra sy fanapotehana. Rehefa izany no manjaka dia korontana lalandava ny fiainana ka aleo mandinika tsara alohan'ny hanatanteraka an'izao sy izao.

Ny fahafoizana dia tsy maintsy misy zavatra miala eo amin'ny fiainana ka izay zavatra hafafofy izay no marary indraindray ary izay no atao hoe sedra, fijaliana hoy i Jesoa ka na manao akory na manao akory tsy maintsy marary izay fahafoizana izay ka mila ho dinihana tsara. Izay mahatonga an'i Jesoa milaza amintsika hoe na iza na iza aminareo tsy hahafofy izay rehetra ananany dia tsy mety ho mpianatro. Izay no tsy maintsy ho tanterahintsika amin'ny fiainantsika, ny fahafoizana sy halemem-

panahy no varavarana hety izay nantitraterintsika nandritra ireo Alahady telo lasa izay, tsy maintsy miditra amin'ny varavarana hety izay te ho anisan'ny fianakaviamben'Andriamanitra. Afaka hiditra amin'izany isika raha manana fahalemam-panahy sy fanetren-tena izay manambara fahafoizana izany hoe tsy mifikitra amin'ny tenantsika fa mahafofy ho an'ny namana izay no lalana nofidin'i Kristy ary dia izay koa ny lalantsika mianakavy.

Raha te ho mpianatr'i Kristy isika aoka ho vonona handao zavatra tsy foy ary dia ho vonona hitondra ny hazo fijaliana miaraka amin'i Kristy izay manambara an'izany fahafoizana izany. Tsy vitantsika samirery tokoa izany ka mila ny herin'Andriamanitra isika. Amin'izao Alahady izao aoka isika hiaraka hivavaka mba hahafofy tena tokoa isika. Hivavaka ho an'ireo mpitondra atsika mba hahafofy, tsy hanjaka ao aminy ny fitiavan-tena fa izay no manapotika atsika rehetra amin'izao satria manankarena isika fa harena angonin'olombitsy fotsiny ka tsy mahaso ny be sy ny maro ka angataka ary isika mba halalaka ny fon'izy ireo hahafofy.

Ry Kristy zokinay ô ianao no nanome anay ohatra velona ary ampianarin'ny fahendrenao izahay hanorenanay ny fanjakanao ao anatin'ny fanetren-tena sy fahalemam-panahy, ampianaro izahay hahafofy, izay fanjakana aorinao eto aminay izay no fanjakana tianay honina eto aminay, izay hiarahanay manorina miaraka aminao anatin'ny fifankatiavana vokatry ny fahalemam-panahy, fanetren-tena, fahafoizana no entinay manorina izany fanjakanao izany eto aminay ka amin'izay izahay dia ho fianakaviana araiky aminao, ho olo araiky aminao ka hahazo ny tena fiadanana sy ny fandriampahalemana ao anatin'ny fiadanana marina sy ny fampanjakana ny rariny sy ny hitsiny.  
Amen

Mompera Arseveka Mgr Benjamin Ramaroson

Tsindrio eto hihaino ny toriteny